

八  
卦  
餘  
生

八卦餘生卷十六

安成鄧夢文潛溪手著

裔孫

擎天珠耀景福  
家訓家謨珠沈重梓  
可行元燈桂芳

䷿ 兌下 坎上

節亨苦節不可貞

水在澤上其受有限故為節節則處身處事皆有所制而無失亨之道也子曰以約失之者鮮矣夫節者節其流也欲以用之也天下無無用之節苦節則株守一偏不近人情人之為道而遠人不可以為道故不可貞不

可以此為是固守而貞之也。若以常理論之苦極必變。反喪所守。則亦有不能貞者。

彖曰節亨剛柔分而剛得中

天下之理陽常有餘陰常不足。然有餘者亦不可過。不足者亦不可不及。剛柔分則均矣。而剛又得中。剛者主也。主立乎其中。則有以善乎剛柔之用。天下之節孰大於是。得中馮厚齋曰。坤分五之六以來居三。是節乾之剛。乾分三之剛以往居五。是節坤之柔。是之謂節也。剛當大君之位而得中。則無過節之苦。斯可通行於天下。

矣此語頗明然柔居剛之三而剛居柔之二以為節者  
剛忌於大露故柔其外以為文柔忌於無骨故剛其中  
以為主節之中者也

苦節不可貞其道窮也

苦節世間必行不去之事故曰其道窮也苦節之道自  
窮也蓋聖人已逆知後世有一種不近人情之人矣孟  
子曰充仲子之操則刳而後可者也

說以行險當位以節中正以通

險者人之所惡也烈士處之不免氣有餘而和不足何

者不愆不節也。君子則不然。素患難行乎患難。何所不說。說。昨樂有險也。自得其素行乎患難而不自擾也。是安節之說也。故曰說以行險。當位以節。則又不止行險矣。凡履其位。皆當有節之心焉。則無過當之悔矣。中正以通。維以剛用。然得乎中正。以通於天下。則節之極嚴而無陵暴之失。何不通之有。通者我往也。有通道焉。非取必於人也。

天地節而四時成。節以制度。不傷財。不害民。

記曰。寒暑不節。則傷世。風雨不節。則無功。是故長養之。

後繼以收歛肅殺之後繼以陽春天地以節而後四時  
成惟王制度授之以節則度有分限不傷財則有餘用  
不害民則有餘力

象曰澤上有水節君子以制數度議德行

度數須制不待言德行美事也亦須議德行不議則非  
禮為禮非義為義苦而不可貞矣

初九不出戶庭无咎

當晦則以晦為節初九處下用晦之時也不出戶庭知  
所止矣故无咎九陽德處陽是為得位故有以貞夫不

可為之時出處士之大節故以為象

象曰不出戶庭知通塞也

知通知塞豈有冒進之羞子曰國無道至死不變強哉  
矯孟子曰鄉隣有閭者雖閉戶可也即初九之謂也

九二不出門庭凶

節之為言止也然非以無所事事為貴也可以行未嘗  
不行可以行而不行是不論可否但以不行為節所謂  
宜纓冠而閉戶節之過者也安所用之誤天下事者必  
斯人也孔子曰邦有違貧且賤焉恥也九二之謂也九

雖有陽德而以兌說為體而處陰位不能奮其剛中之用矣故有不出門庭之象

象曰不出門庭凶失時極也

需事之賊也是以聖人不違時

六三不節若則嗟若无咎

六三兌之主以陰柔處陽位不能執節鬚眉而巾幘者也一失莫贖徒自嘆悔耳無歸咎也

象曰不節之嗟又誰咎也

苦節有凶而無悔不節无咎而徒嗟

六四安節亨

以六處四柔而能中以節處止無事激切以節處行不至張皇從容詳審行止有常故曰安節安節人亦安之無行不可往無事不可理故亨

象曰安節之亨承上道也

承上道承上之道也大臣和而有節不激不隨事上之道宜如此也

九五甘節吉往有尚

安者自然而然節而不矜者也甘有樂之之意焉九五

履其位而樂有節矣。以天下之節節天下。天下皆範於節之中。吉道也。以此道而往。和而不流。久而不散。可尚者也。

象曰：甘節之吉，居位中也。

居位中，居五位之中也。胡雲峰曰：九五當以節節天下，是也。九五甘節以節天下，而天下不苦矣。有子曰：禮之用，和為貴。先王之道，斯為美。甘節之謂也。

上六：苦節貞凶，悔亡。

不出門庭，未苦也。以六處上，性偏於陰，無事自苦，若徒

不近人情以自矯異蛇足者也雖貞亦凶鮑焦立橋黔  
敖嗟來何常不貞然無益世教徒自隕滅可不請凶乎  
悔亡者何也能悔則凶亡矣節可悔乎曰節不可悔悔  
其過而苦者也此等人畢竟要在君子一路上做事而  
自律大過故聖人開悔之一路以裁之使就於中憫而  
不欲棄之也若自以為是死而不悔則亦末如之何也  
已矣胡雲峰恐悔其節而不節謂當以本義禮奢寧儉  
為正若不知節悔何足言聖人但令人悔其可悔豈令  
人悔其不可悔者哉狂簡未至於苦聖人猶欲裁之况

節苦而不悔何能裁耶然則為之奈何苦節本欲立絕人之行乃以苦之故至於无節可立苦亦何為是不可悔乎畢竟久中有此兩路故又詞兼言之聖人因以戒之

象曰苦節貞凶其道窮也

其道其人之道也道原不窮苦節之人其道自窮耳子曰人之為道而遠人窮也是以君子弗為也

節天下之制也人未有无節而可以自立者事未有无節而可以常行者六爻之節各就其人之所處而言之

蓋節雖君子之所貴而亦病於失中不節者不足言而苦節者亦節之蠹君子觀於節而節之道思過半矣註謂節之初節之終則又以節為有形之物事矣可乎雖云就卦爻言之然不無語病

䷮  
異上下

中孚豚魚吉利涉大川利貞

孚信也中心實相孚信也卦之取義未得深曉本義云下說以應上巽以入有孚之義焉姑從之豚魚吉中孚驗之豚魚乃吉也利涉大川木行水上無所不濟而况

處澤乎利貞雖利涉而猶不敢縱也此見中孚之德可以涉險而必以守正為要不可輕試子張問行子曰言忠信行篤敬雖蠻貊之邦行矣利涉大川之謂也立則見其參於前也在輿則見其倚於衡也夫然後行利貞之謂也

豚魚吉至誠而不動者未之有也然吾嘗驗之亦有誠而不能動者矣所謂不能動者非愚夫也乃身衣冠而口仁義者也然誠有所不能動况豚魚乎是聖賢之言有時而不驗矣非也豚魚雖无知而生理无偽故誠至

得以入之理相感也。若誠所不能動之人，一味機械變詐，出於物理人情之外，誠雖至，不受也。故格豚魚易，而格若輩難。若輩雖口談仁義，身冒衣冠，不如豚魚之无知也。是以堯舜之世，猶有四凶，非堯舜不能格豚魚也。堯舜能格豚魚，而終不能格四凶，吾是以謂格豚魚易，而格若輩難也。況於後世，若輩之肺腸，又十百於四凶，而人又以尋常之誠信，區區欲以孚之，不已疏乎？及其不孚，而後悔誠之不能格物，謂豚魚之言不信，不知人自不能度量，以豚魚望若輩，用意太奢，非豚魚不可格。

聖賢之言有不驗也

象曰中孚柔在内而剛得中說而巽孚乃化邦也

柔在内而剛又得中剛柔和矣是說為真說巽為實巽以此為孚邦國之人无不化服矣天下之理止有一中一實而天下之人心收於此矣

豚魚吉信及豚魚也利涉大川乘木舟虛也

凡誠之動物皆在兩无意之中有莫知其然而然者人未嘗與豚魚相與也而信及之者真也然而人則未必盡孚也吾又以此論誠矣有所感在此而所動或未必

在此旁觀之人皆信吾之誠而所感者漠如也夫是以  
觀人之誠者不觀之於不可方物之人而觀之豚魚亦  
惟其真而已矣以木乘水而又加之以虛何涉不利然  
則不虛不可以動物又孚者所當知也

### 中孚以利貞乃應乎天也

信之至者或不以正尾生之信君子不取也況天地乎  
若真誠發於至性匹夫匹婦可泣鬼神故誠而正君子  
之所以動天地也中庸以誠合天蓋以此乎

象曰澤上有風中孚君子以議獄緩死

巽巽也巽而不迫。兑說也。和而不嚴。以此意施之於獄。雖有當決之罪。而尤存哀矜之心乎。

初九虞吉。有他燕燕。

中孚之義。朱子以為不可曉。今觀六爻之詞。甚有難解。亦不敢盡依傳註。姑妄言之。

初初與人相與。未知其人之可信否也。則當虞度之。既度其事。又度其人。苟情理可信。當亦不遠。審度既定。便當專一無二。所以為孚也。嘗見人之相與。本屬可信。以旁人煩言。遂疑惑不察而棄之者多矣。故雖用虞虞其

可虞信其可信我心自知而自孚非旁人之所能忖也故曰虞吉此不能信而以理守信虞於前而孚於後未有失也虞吉吉在乎於所虞也若既度於既之可信而不能固守又惑於二三而有他意如此則真不孚矣輕負之亦將輕悔之在旁人不相關切者或視為无妨而已心不能自釋之處則終不能以自安矣故有他不燕燕安也蓋不逆詐不億不信而先覺者賢也既不能不逆不億而虞之又不能久要而他之凡見如此之人而能自得其心而晏然者乎

象曰初九虞吉志未變也

初惑尚淺初志未變但能虞之自可得吉

九二鳴鶴在陰其子和之我有好爵吾與爾靡之

鶴鳴在陰子不聞也而和之天相感也好爵在我非彼所敢願也而與爾靡之神相契也人之契者生死可共而况好爵乎此孚之至者九居二是有實德存於中者故其象如此

象曰其子和之中心願也

中心願中孚也中心不孚有不願者矣

六三得敵或鼓或罷或泣或歌

天下之異而不相孚信者無甚於敵得敵則合異為同矣然而心不肯信也猜疑橫生離合不定故有或鼓或罷或泣或歌之象鼓所以為樂也而或罷之不敢以得敵為可樂也泣所以為疑也而或歌之又欲自解自慰也兩心不孚光景如畫

象曰或鼓或罷位不當也

以陰居陽人非其質故不能擴宏人之度而聯異為同  
六四月幾望馬匹亡无咎

月幾望。實猶有不足也。馬匹亡。不能保其所有也。然幾望亦將望矣。匹夫未盡亡也。此見信不至而不能大有所孚。亦不至大有所失。可无咎矣。六四全陰。故不能孚乎。

象曰馬匹亡絕類上也

未甚喻匹亡。故為絕類上也。殆欲進而求之乎。不盡孚之中求孚而未已也。

九五有孚攣如无咎

五陽實於中。而處尊位。能以信喻人者。故有孚。然有信

之意而未能化於忘也。故學如諄切丁寧以示其誠信。未能擴然大同。非大君之體。故但能无咎而已。

象曰有孚學如位正當也。

位正當者所處之位信可遠施。學如則已小矣。惜之也。  
上九翰音登于天貞凶。

記曰雞曰翰音。翰之為言長也。音則徒以聲而已。夫自鷄言。雖曰翰音而音於雞。其翰幾何。此見中無實德。欲以空言求信於人。如雞之翰音而欲登于天。不自度量之甚也。出言雖正。不能感人。雖未必窺見底裏。乃其所

以不能動物之實不可強也。州里不行動而得擇非人之咎也。乃自取凶也。巽為風為雞。上九處巽之極空以聲聞而不能及遠。故其象如此。

象曰：翰音登于天，何可長也。

何可長，言不能久也。以聲音悅人者，能得幾何時？必不孚之道也。

凡誠之動物也，非可驟得也，皆在兩無意之中，積久漸孚，不期然而自然，莫知其所以然而忽然也。如風行草上，水到渠成，故曰孚誠之者不預必也。今之與人者，雖

曰至誠然存之於心未免有自以為誠之意夫自以為誠則有意矣有意則雖誠而去天遠矣夫物不可以有意動也況彼豺狼而衣冠者乎故豚魚可格誠之無意也衣冠之士有不可格誠之有意也中孚雖取風澤或者有風偃渠成之義乎

朱子曰孚字從爪從子如鳥抱子之象今之乳字也一邊從孚蓋中所抱者實有物也中間實有物所以人自化之因此思之鳥之育子也自氣而形自無而有著一毫虛假不得著一毫倣作不得人之孚也亦如是自無

意而有意。自無情而有情。曰膠曰漆。而不可以辭結也。  
曰金曰石。而不可以形固也。白首如新。傾蓋如故。動於  
精神。心術之微。不可以力劫。不可以知籠。是之謂孚。是  
之謂中孚也。其在卦也。四陽居外。二陰居中。陽動而不  
傷。陰靜而不亂。綿綿杳杳。若有若無。幾乎微乎。無形無  
象。而朕兆生焉。萬物苞孕。於是陽中有陰。陰中有陽。陰  
潤於中。而陽巽於外。其為中孚也。渺乎茫乎。未易言語  
求也。

䷼ 艮上

震下

小過亨利貞可小事不可大事飛鳥遺之音不宜上宜下大吉

陽大陰小四陰在外二陽在中故為小過小者過也事雖小過不害為亨然須以貞為主柔得中故可小事剛失位不中故不可大事遺音留音也飛鳥遺之者其義未詳然不曰飛鳥遺音而曰遺之音似乎鳥去而音存以喻事往而過在也鳥音上則無與聞下則眾共聞之君子之過也遂之則成其過與眾共見之則如日月之食焉眾且仰之而行並光大吉之道也不宜上不宜負

氣上人宜下宜虛心引咎衆人以過為諱而不知認過  
乃所以為吉也

彖曰小過小者過而亨也

雖小過而不害其為亨也

過以利貞與時行也柔得中是以小事吉也

過以利貞與時偕行相似如仲逸身中清廢中權

剛失位而不中是以不可大事也

此合柔得剛失兩節與傳註俱不同

小人縱有作為分量有限故止可小事則吉天下大事

非陽剛君子不能任乃失位不中不得為所欲為故不

可大事四可言失位三不中豈以重剛乎

有飛鳥之象焉飛鳥遺之音不宜上宜下大吉上逆而下順也

有飛鳥之象焉未嘗取象之義諸家強解皆未見其確然意者小過率意而動不及致詳如飛鳥任性而飛不知所往故以為象乎上逆而下順者音上徹則逆逆者氣有所拂也下聞則順順者空中布響無所與隔也以喻人負氣上人而遂非則人心共拂虛懷下氣而引咎則人心共諒順逆之故吉凶之所以分也從來文過愈

文愈拙而無所歸落退避一步便履實地必然之理也  
象曰山上有雷小過君子以行過乎恭喪過乎哀用過乎  
儉

恭哀儉皆美德也然各有節焉過之則雖美而病德矣  
不得已而處過寧若是焉爾聖人非欲人過也然而君  
子以之或因流俗失世敗壞矯偏救敝非小有所過不  
足以改觀易聽乎

初六飛鳥以凶

艮於象為止而初又處止之最下不宜動者也飛鳥以

凶妄動之為害也。吉凶悔吝生乎動。止則不過。動則過。飛鳥不能遠。故為小過。

象曰：飛鳥以凶不可如何也。

不宜飛而飛。自取凶咎。無可如之何也。

六二過其祖。遇其妣。不及其君。遇其臣。无咎。

祖妣君臣。未審取義之故。程傳皆以三為父。四為祖。五為妣。夫三父四祖等而上之。則五尊於四。六尊於五矣。五安得為妣。程傳知其牽強。復於妣上加一祖字。以為祖妣。然則即是祖妣。不與祖同爻。而上居五。是祖妣亦

尊於祖矣。理之最不明者。且過祖遇妣。當求其取義之  
故。今不求其義。而但推文象。以為某父某祖某妣。即如  
所言。亦何有意味。吾是以不安於心。而不以為然也。  
象曰。不及其君。臣不可過也。

臣不可過。所以示為下之分。以戒士之不自度量者。

九三弗過。防之從或戕之凶。

小人恣睢之行。君子之所謂過。而加意防之者也。若乃  
弗以為過。而不為防之。則我雖欲與之遊於大同。彼且  
以我為易與。而肆其險詐。受其戕賊矣。九三以陽處陽。

不應如此。所以如此者。艮之主也。安於所止。宜過而不  
過。凶之道也。此文余初以為弗肯過防。與傳註同。已而  
思之。弗過防之。弗過過之。文法相似。不應參  
差。故改為此說。然意實未嘗有別。防小人。不免小過。而  
三獨弗過。易之道。每至三爻而變也。

象曰。從或戕之凶。如何也。

為或所戕。其凶如何。君子弗為過。

九四无咎。弗過遇之。往厲必戒。勿用永貞。

九四以剛處柔。可以无咎矣。惟是待小人。不但弗以為

過而又寵遇之夫豺狼之不可親非謂恩少也搏噬之性不可與為恩也小人亦然我雖欲收之於儕類之中無如其另具肺腸何也我如自信其禮遇之厚而往與之從事不受其反噬必受其愚弄厲也必矣是必當以為戒斷不可永貞初心而固執已見蓋時使然也

象曰弗過遇之位不當也往厲必戒終不可長也

四大臣之位以九處之未為不當况以陽處陰不過於剛正得其宜其言不當者大臣當以進賢退不肖為事其所處之位不當優容小人也九四蓋以務為長厚而

過焉者也。終不可長者，所以發明小人心事，言其必不能長久。君子非不欲與之偕於大道，勢不能也。是以往屬必戒，而勿用永貞，非得已也。九四蓋欲調停君子小人，以養和平之福。此意本厚，而誤用之，是以謂之小過也。

### 六五密雲不雨，自我西郊。公弋取彼在穴。

陰陽和而時雨作。小過陰盛無陽，故為密雲不雨之象。言陰之過也。弋所以射取，彼在穴則非穴也。掩其不脛，是為不當取而取，取之過也。其曰自我西郊，曰公穴，取

彼在穴似周公傷文王不得君之事乎。密雲不雨自我  
西郊。陰陽不和不承天澤也。公殆以喻紂也。在穴以喻  
服事之誠。未嘗如飛鳥之敢縱於天下也。公弋不取飛  
鳥而取在穴。則公過矣。五君也。震雷也。言非所震而震  
之也。猶若以文王之故為公諱言之。故為小過。

象曰密雲不雨已上也

陰已上。陰之甚也。獨陰用事。是以不雨也。

上六弗遇過之飛鳥離之凶是謂災眚

弗遇弗與小人接遇也。既弗與相遇。斯亦已矣。却又過


之過之者尤之也。言惡而尤之。往與小人尋事也。當陰過之時。羣陰方盛。正見惡人辟咎之時。而又可過乎。如飛鳥不知止息。自罹網羅。安得不凶。人青天災。駢至並集。匪人為之。自取之也。是之謂真災。真青。犬甲曰。天作孽。猶可違。自作孽。不可活。此之謂也。

象曰弗遇過之已亢也

已亢言上處已之過亢也。陰過甚亦咎不止。陽亢為病而已。

小過始終以飛鳥為言。飛必離凶。宜下不宜上。是卦中

所諄切戒喻者。大率羣陰方盛微而處於內。故宜伏而  
不宜往。惟在穴被取。咎非自致。然是不善弋者之過也。  
君子盡其在已者而已。

  
離下  
坎上

既濟亨。小利貞。初吉終亂。

水上火下。水火各得致其用而相成。故既濟。既濟則亨  
矣。曰亨。小者何也。小者亦亨也。小者陰也。小人也。小往  
大來。為泰。泰之時。雖君子道長。不免小人道消。惟既濟  
不但君子亨。小人亦亨。若小人不亨。則為不既濟矣。故

卦之美莫如既濟也。利貞者君子小人各安其位。利於長相守也。所謂得意防驕也。初吉者濟也。君子小人並濟也。終亂者疎也。君子小人不能久相安也。

彖曰既濟亨小者亨也

小者陰也。臣也。婦也。小人也。皆陰也。凡事之濟雖君子以乾剛之德斷而行之。然必得小人輔助之力而後成。故水以濟火而成烹飪。陰以濟陽而成歲序。小人同心協力以濟君子而成事功。故曰小者亨也。陰不干陽。小人不阻君子也。

利貞剛柔正而位當也

剛柔正而位當者言剛柔各得其正而各安其位也。又位陰陽正而當未有如既濟者。於是乎既濟則當安以守之以求濟而不可亂故利貞。

初吉柔得中也

亂天下事者小人也。柔得中則柔不為害而能以陰濟陽故吉。所謂小者亨也。是以有君無臣君子傷之。

終止則亂其道窮也

陰欲靜故柔得中而初吉。陽欲動故天行健。君子以自

強不息終止者陽止也。陽之所以止者何也。陽本無止而處陽而履泰者不免以既濟生驕盈而有怠惰之心故止也。止則勵精圖治之意微矣。非至誠無息天行健之道也。是為无終无終則不能初之吉而亂生。蓋時極道窮窮則變治極生亂亦必然之理也。

象曰水在火上既濟君子以思患而預防之

日中則昃月盈則食。生於憂患死於哀樂。先事預防處既濟之道也。

初九曳其輪濡其尾无咎

曳其輪不遽進也濡其尾不遽行也事雖利於有為而亦病於躁動天下有需而无咎者既濟之初是也淺見之士快於一擲而不思其後事必不濟而悔不可追然後知初之沉幾非畏首尾者也濟事之人作用自不同也初處事之始故宜慎重如此九之所以為九也若六則何足貴焉

象曰曳其輪義无咎也

曳其輪似失之畏縮而於義則為无咎慎行寡尤也

六二婦喪其茀勿逐七日得

意外之虞何所不有但心苟無瑕何恤人言婦喪其第婦之醜也然非貞婦之病也苟逐之則竊第者得計矣弗逐則小人之計自窮彼原非以第為利但以難我耳若持之而無所用則將返之所謂山鬼之伎倆有限吾之鎮定無窮也此以不求濟而濟者也六二柔中正而順守貞自信得固安處即不得不計也

象曰七日得以中道也

六二柔道得中縱有不虞有必伸之理

九三高宗伐鬼方三年克之小人勿用

事之濟莫大於征伐故以高宗伐鬼方為義高宗賢也  
三年克之難也然而必克濟也蓋天下之事雖君子為  
之而又得時亦有未易濟者但要以定心持之而已但  
為其可為事必終濟小人勿用者事當未濟之時便有  
多言撓惑以亂聽者若持之不堅欲更用小人以圖近  
功小人竊弗者也用之必敗吾事寧持重以需之不可  
用輕疎之人無益而有害也三以陽處窮極易於躁而  
妄動故戒之如此

象曰三年克之憊也

億者倦傲也。億則億矣。終於有濟。擠則濟矣。億而後濟。天下无易事。君子无近功。雖曰既濟。濟豈易言哉。

### 六四繻有衣紉終日戒

甚矣濟之難也。雖有可成之機。猶有敗成之害。不可以為事之將濟也。而無戒心。終日憂虞。庶可獲吉。繻程傳作濡。謂罅漏也。衣襦塞罅漏者也。謂塞舟也。利涉大川。舟之所以為濟也。而罅漏不戒。則一隙之疎。全舟將覆。惟事亦然。一著之疎。全局為敗。不可不慎也。四處大臣之位。居坎水之初。故有舟楫之任。而凜衣襦之防。但在

後世引用則衣衾之戒人君之事也

象曰終日戒有所疑也

疑事之有可疑預防之詞也無不思也無不慎也則可疑者見矣凡人百密不免一疎者皆由不能戒也

九五東隣殺牛不如西隣之禴祭實受其福

所謂濟者雖云得時實非倖成雖有能濟之道乘可濟之時全在根本處得力而一切勢力之強財用之富殊未可恃是以古之濟大事者必兢兢業業謹凜於人所不見之地此疑承天命之本而建國之初必先立宗廟

亦識此也。聖人論濟必極根本而言之。微乎微矣。苟為不然。時雖利未也。人力智巧有之。而非所以濟也。如但以人官之能論之。則殺牛豐也。禴祭儉也。福不當在牛乎。然殺牛不如禴祭之受福。則祭有祭之道焉。不在脩物也。東隣西隣。泛相較量。以見義耳。傳註以東為五。西為二。是五不既濟。而九五之陽德。不如六二之妾婦也。象曰。東隣殺牛。不如西隣之時也。實受其福。吉大來也。不失其時。慎之至也。祭雖禴。而神享之。誠敬既至。不貴人以不辨也。失其時。非怠則瀆。雖或殺牛。神吐之矣。君

子之於事也亦然應機而赴時則力省而功倍失時悖道勞而罔功矣福之道在時而所以獲福則不專在時也誠至所以能時也

### 上六濡其首厲

處可濟之時而濡其首其不濟也非天也人也此與濡其尾不同者濡其尾進也但從容而不急遽耳濡其首則以首鼠坐失事機故為可恨厲也自致之也又誰尤上以柔處險極不能用柔者也

象曰濡其首厲何可久也

處屯則有亨屯之事處泰則有保泰之事无无事之時也處既濟之時而濡其首安可久長邪

以卦言之既濟之卦也以濟言之則濟之中又百千異態而不可窮詰蓋人之所處不一其位而事之所值不一其時故六爻各分其人與時而言之初始事者以慎濟二涉於事則心跡易晦以守正濟三處其難則氣亦易隳以堅忍濟四處其成恐功虧一簣以憂虞濟五為事主窮事理之原成敗希忽以根本深厚濟六事既濟宜奮起精神明目張膽為天下先乃濡首自喪謀之不

戒自貽伊戚不能善其濟各就其人言之也五爻為君  
說卦之定例也其實不然各象其爻之所值君不專在  
五也既濟之五爻可見也君尊无偶安得有東西隣兩  
鄰並列其非君甚明也說者遷就以為文王與紂之時  
甚為不然商德雖衰天命未改以服事殷周所以稱至  
德乃云東鄰西隣豈文王之心乎高宗伐鬼方明是大  
君之事乃在三爻衣袽之戒豈專為臣言乃在四爻易  
者易也隨事變易拘定成例執而不化豈易成邪

既濟惟六二九五最為可味二以中往濟之正也五以

剛主濟之本也。執中則可以涉變，故而不滯。處剛則可以起象寡而獨濟。

䷧ 坎下  
離上

未濟亨。小狐汔濟，濡其尾，无攸利。

水火不相為用，故云未濟。未濟矣，何以亨？未濟者，時也。天也而亨者，道也。君子不能違時，而時亦不能詘道也。如不自度量，勉強求濟，則如小狐汔濟而濡其尾耳。終不能濟，何利之有？蓋汔濟者，小狐之所自料其能也。而以濡尾失之，則不自度量之過也。君子之於事也亦然。

自謂才可以幹濟一世而不知時有未可力有未辨冒  
任而輕嘗之鮮不仆矣語云謀事在人成事在天是以  
君子貴知幾也小狐云者才綿力弱未足以濟也漆雕  
開吾斯之未能信小狐之不敢輕試者也

彖曰未濟亨柔得中也

未濟卦柔皆剛位而云得中者柔以濟剛也處柔之時  
故未濟而能得中則未濟何害亨在我不在外也況得  
中有濟之理乎

小狐汔濟未出中也濡其尾无攸利不續終也雖不當位

剛柔應也

未出中未出險中也險不可嘗試小狐輕犯險汔濟用力亦勤矣未出中則猶之為險所困也不續終續繼也力綿才弱不能終事而繼續其所為以至於敗也剛柔應者六爻剛皆居柔位柔皆居剛位柔中有剛剛中有柔是相應也剛柔失位不可以有濟然處未濟之時穎不欲露晦不欲懦所以賴委蛇於其間者此耳

象曰火在水上未濟君子以慎辨物居方

水火各得其位剛柔各止其所辨則不清居則不移時

雖未可有為而君子之道則不容無所辨別

### 初六濡其尾吝

尾末也濡其尾幾濟而莫不濟者也故卒至於吝初居坎水之初六綿而不克竟涉故有濡尾之象

### 象曰濡其尾亦不知極也

極終也見其始不料其終始欲有為而卒之力不從心最所謂未出中也凡人見事似乎可為而不知事幾變遷頭緒萬狀有出於意料之外而不可捉摸者蓋身試之而後知其難也此沉幾之士所為詳審顧慮而不敢

以易心輕嘗天下事者識機於早也世不乏才智之士其任事亦非不勇而卒之中道而蹶者非盡事會之難血氣之剛心大猛歷練之勁骨未堅一挫則折皆小狐濡尾之說也

### 九二曳其輪貞吉

曳其輪見不可而止也知其不可而止之非不為也貞也將不至有濡尾之失故吉也九二以陽居陰剛而能柔故可行可止老成之士也識大於初六矣

象曰九二貞吉中以行正也

九居二不為得位以行之正故得吉

### 六三未濟征凶利涉大川

六居三才綿力弱未可濟之時若冒然以往勉強一擲安得不凶三居險之極將脫險矣故利涉大川然涉非征乎既云征凶何又言利涉此諸家所以疑涉上當有不字謂其語自相背也吾意既云征凶則不利涉已在其中何以又出不利涉一語不已復乎則謂不利涉亦非也仍當以利涉為是所以然者世原有水陸兩路馳馬者不利於水而憑河則溺征凶之說也操舟者不利

於陸而風濤不驚。利涉之說也。君子之於事亦有然者。是以征凶利涉不妨並行。蓋各相其所宜也。利涉於征凶之時者。似有改圖之意。不可執而不變。昧事幾而快一往以自取凶也。

乃吾又有說焉。未濟征凶事之常也。義在不可已。雖知征凶而不可不往者。事之正也。志士仁人無求生以害人有殺身以成仁。征凶利涉之說也。人以征為凶而君子以求仁得仁為利矣。況所謂凶者不必皆遂死亡也。寧武子不辟艱險。可謂征凶矣。而必不可不為。則利涉

也。後卒賴以濟涉之利也。然非征之時所敢必也。是利涉即在征凶之中。君子但涉其所當涉而已。其二語原不相背。若以占象言。則凶中之吉也。

象曰未濟征凶位不當也

六非濟險之才而處任事之位。故云位不當也。然則利涉大川則當辭其位而求賢以濟也。

九四貞吉悔亡震用伐鬼方三年有賞于大國

九四雖處未濟之時而居大臣之位則不可退避之位也。故不可以其未濟也而諉之。守之以貞。所謂鞠躬盡

瘁死生以之以居臣職是貞也於道為吉在悔則亡也  
鬼方作亂不可不討不言高宗國之大事大臣之任也  
將焉避之惟有贊其以震伐之耳震者震其威也三年  
難且久也此中事勢詭誕身家禍福朝暮不保如武元  
衡裴度之於淮蔡誠有未易言者乃毅然不回以死守  
之必求其濟可不謂貞乎有賞於大國濟也未濟而必  
為難且久而不輟是以終濟也向使不能守之以三年  
則濟尚未可必也是以云未濟也

象曰貞吉悔亡志行也

志行必行其志也處未濟之時居可為之位不但不挫終有吉而無悔向使志不必行亦且有悔无吉矣所謂有志者事竟成也

六五貞吉无悔君子之光有孚吉

五尊位也以本卦言之則未濟之五乘權之五也大人而用晦者乎含藏貞也得已吉也遜世无悶不見知而不悔悔亡也身雖隱而道益光君子之光也為百世之師世道世法世則乎何如之吉何如之不必功業而後顯也六五之未濟真不濟也天窮之矣以求諸人其惟

夫子乎。

象曰君子之光其暉吉也

君子之道闇然而日章及其至也光被四表格於上下  
上九有孚于飲酒无咎濡其首有孚失是

上九非隱者也居其位矣有孚人信之衆望之所歸也  
有可濟之時而又居能濟之位可以求濟矣顧乃耽於  
酒食處其位而不履其事者也苟且自免而已故无咎  
容容多後福之人也於身雖无咎於事則不濟矣濡其  
首畏首畏尾也人方信我之深望我之重而我乃自失

其時不亦可恨之甚乎

象曰飲酒濡首亦不知節也

不知節就於晏樂廢時失事也上九之未濟人也非天也未濟者道可以濟而時未可濟也六爻各就其所履之位所處之時及其剛柔之宜與否而分言之初志在有為不度而進事雖正而心無揆變之思二知其不可為而不為守貞不肯輕動雖未有濟而不失其正三明知其不可而貪冒於行四時雖未可濟而位不可避當以堅忍持未濟之時五則不見而章不濟不足以言

之矣六有可為之位有可濟之理人皆望之乃不肯以  
身任天下之重所謂自棄者不可與有為人之最不肖  
者也

八卦餘生卷十七

安成鄧夢文潛溪手著

繫辭上傳

天尊地卑乾坤定矣卑高以陳貴賤位矣動靜有常剛柔斷矣方以類聚物以羣分吉凶生矣在天成象在地成形變化見矣

因天地而定乾坤因卑高而位貴賤因動靜而斷剛柔因方物而生吉凶因形象而生變化卦之立體錯變致

用皆實理實事誠之不可掩實理也至誠如神實事也  
亙古今之吉凶悔吝有未能出於實理實事之外故執  
理之極可以前知非影響推度僥倖億測而已本義謂  
變化者易中著策卦爻陰變為陽陽化為陰似以變化  
分屬陰陽然乾卦有云乾道變化各正性命則陽未嘗  
不言變也二字似通用不必分屬

法象在天地間未嘗不昭著然非聖人不能悟也夫尊  
卑貴賤迹之最顯者也然不經指出則亦莫能明若夫  
以動靜斷剛柔以分聚生吉凶以形象成變化則又微

乎其微矣。況乎其中之千端萬緒而不可以一律齊者哉。是則悟其所以然。頭頭是道。易也簡也。不得其所以然。雖聖人諄諄言之。而猶不識其所指歸也。易之道盡天地。而人不能盡。易云乎哉。

### 是故剛柔相摩八卦相盪

相摩則變化生相盪則致用異

鼓之以雷霆潤之以風雨日月運行一寒一暑

雷霆風雨錯綜其小節日月寒暑經紀其大常

乾道成男坤道成女

成男成女。乾坤之義立。而人道之事備矣。

雲峰胡氏曰。剛柔二爻相摩而成八卦。八卦相盪而成六十四卦。六十四卦之中。自有雷霆風雨日月寒暑卦之中。自有男女變化而成形者也。易之未畫卦之變爻。在天地之實體中。及其既畫天地萬物之變。又在卦爻實體中。

### 乾知大始。坤作成物。

大始。天地之始。乾坤者。易之乾坤也。易本大始。以立乾。大始即乾之始。故云。知大始。非別有一大始。而乾往知。

之也。坤作成物則成乎乾而已。

### 乾以易知坤以簡能

乾天地之健也。天地之健所以始物。非別有運用以始之。故曰易知。知即知大始之知。坤天地之靜也。天地之靜所以成物。亦非別有紛應以成之。故曰簡能。能即成物之能也。天地間萬事萬物皆收於易之乾坤中。而易之乾坤皆天地間自然之生意也。

易則易知。簡則易從。易知則有親。易從則有功。有親則可久。有功則可大可久。則賢人之德可大。則賢人之業。

惟其易也。故易知也。惟其簡也。故易從也。聖人之意若  
曰。道不遠人。人自求諸難耳。易知如日月之可見。人皆  
樂就之。故有親。易從如坦途之可遵。中人可勉。故有功。  
有親則可以常相安。故可久。有功則可以漸相積。故可  
大。可久則日新。賢人之德也。可大則日崇。賢人之業也。  
此則就人言之也。易與簡不但乾坤人亦若是已矣。人  
能如乾坤之易簡。則人之知之從之親之功之可久可  
大。德新業盛皆從此中出。孟子曰。所惡於知者。為其鑒  
也。如知者。若禹之行水也。行其所無事。而天下之事畢。

矣。

易簡而天下之理得矣。天下之理得而成位乎其中矣。

曰易曰簡而天地間萬事萬物之變皆盡乎此。而天下之理得矣。經綸天下之大經。立天下之大本。知天地之化育。亦只在易簡中。然則人亦何苦以私意勞擾愈遠而愈難邪。成位者。天地位也。以易簡位之也。天地位而萬物育。聖人參天地之事畢矣。

右第一章

由天地得乾坤。由乾坤得易簡。由易簡而成德業。乃

知夫子所謂道不遠人孟子所謂道在邇而求諸遠  
事在易而求諸難者非僅僅株守於日用常行之事  
也謂當求於易於簡也但此中頗難理會殆顏子所  
謂高堅前後者乎然則後世之言易數者大煩大難  
吾知非聖人之易也小道之可觀者耳

聖人設卦觀象繫辭焉而明吉凶

乾坤之理不可見也故聖人設之卦以求其象八卦之  
象不可明也故聖人繫之辭以顯其機卦之變起而吉  
凶生吉凶非可超辟也而所以吉凶之理在先天未動

者則可得而言也。人苟知其所以凶而幹旋之道思過半矣。此易之教所以為大。非僅卜筮之而已。

### 剛柔相推而生變化

一時有一時之剛柔。一人有一人之剛柔。一事有一事之剛柔。各以其時其人其事之剛柔相推而生其變化。則象之所兆各不相襲亦不相借而其用無窮矣。

雲峰胡氏曰。占以辭而明故曰繫辭焉而明吉凶。變由象而出故曰剛柔相推而生變化。

是故吉凶者失得之象也。悔吝者憂虞之象也。

吉凶悔吝者卦之象也。得失憂虞者事之應也。

變化者進退之象也。剛柔者晝夜之象也。六爻之動三極之道也。

變化者。非徒陰陽之動變而已。人事之進退象於此矣。吉凶有定。不可進退。而所以吉凶之理。則可得而進退。進退者。遷移之辭也。晝夜者。天地之運也。而剛柔象之。晝夜運而不已。則剛柔亦當變而不執。三極盡乎天地之理矣。而六爻象之。則天道之不昧。地道之有常。人道之是非。皆具於一卦中。可得而自攷也。合於三極。則不

愧不怍無入而不自得矣。不合於三極雖名之為人實則有覲面目將何之焉。然則聖人之所貴者貴其示人之顯而切也。非徒為人事之吉凶而已。子曰知進退存亡而不失其正者其惟聖人乎其理微矣。

是故君子所居而安者易之序也。所樂而玩者爻之辭也。居而安易之大體統也。序者天道常然之次序也。樂而玩易之深入處也。精義入神有不可窮之妙焉。而吉凶悔吝之際竦然矣。

是故君子居則觀其象而玩其辭動則觀其變而玩其占

是以自天祐之吉无不利

象者易之象辭者爻之辭也居則觀其象而玩其辭此言君子居常則易不可不讀也變者卦之變占者事之占動則觀其變而玩其占此言筮則專兆於已不可不深味之以求其故也君子之於易也无時无刻不以存心故進退存亡不失其正則可以獲天之依其曰祐之是冥默之中所加意者也其曰自天祐之則所以致祐之之道又全非微倖亦非取必於天若謂必如此而後能如此也夫渺乎茫乎巍巍而不可問者天乎夫子曰

自天祐之。聖人豈欺我哉。詩云敬之敬之。天維顯思。行法以俟命而已矣。

右第二章

易之作也。聖人非苟以為人占休咎而已也。設卦示象繫辭。所以示人於三極之道。而使之析天永命者也。曰。是以自天祐之。吉无不利。聖人之所以輔相斯民。而令人於天者。莫大於易。若夫吉言吉而凶言凶。非知易者也。由斯言之。天未嘗有心禍福人。聖人未嘗不明白示人。以自求多福。語之而不從。喻之而不

信斯莫如之何也已矣

彖者言乎象者也爻者言乎變者也

卦雖兆象非彖不顯卦雖示變非爻不明

吉凶者言乎其失得也悔吝者言乎其小疵也无咎者善補過也

卦之吉也非無故而吉也必有所以得之而兆其吉者卦之凶也非無故而凶也必有所以失之而兆其凶者是吉凶者言乎其失得也或言吉凶有一定何以專歸於失得嘗試思之一卦言吉必有一段吉之話說假令

不如此則不吉矣。如一卦言凶必有一段凶之詁說。假  
今不如此則不凶矣。夫所謂假令者。非失得乎。則吉凶  
者。非言其失得乎。小疵者。失得之未甚者也。故不言凶  
而言悔吝。善補過者。其人其事本可以致咎。咎則為凶  
為悔。為吝皆不可定。惟其猶以某事之故也。故无咎。夫  
以某事得无咎。是以某事補某事之失也。因某事救某  
事是補過也。因以得无咎是善補過也。孰善之。天善之  
也。天之於人也。未嘗不欲其有得而無失。冥默之中。每  
相准。折非有心。屑屑較量如水之平衡。自然而然。人苟

不占於易亦孰自知其過自知其補過而天之善其補過也哉天人之際蓋如影響讀於易而竦然也夫

是故列貴賤者存乎位齊小大者存乎卦辨吉凶者存乎辭

貴賤之位六爻具矣小大之等八卦包矣吉凶之理彖爻顯矣小大謂小大之事易之道大無不至小無不蕪故人得以占筮考其吉凶非陰陽小大之說也

憂悔吝者存乎介震无咎者存乎悔

此咸其拇艮其趾之時也不於此時憂之則措足一失

悔吝隨之矣。无咎可以免矣。而未善也。其所不善者。猶在也。不大有以懲創之。无咎可長恃乎。悔者。良心發見。最為真切。所以滌腸洗胃。去舊從新。化小人而為君子。以自求多福者。在此也。子曰。吾未見能見其過而能內自訟者也。是悔之說也。

是故卦有小大。辭有險易。辭也者。各指其所之。

總收言之也。各指其所之。似乎已包盡古今事變矣。非聖人不能為。非聖人不能知也。

右第三章

列貴賤齊小大辨吉凶易也而憂悔吝震无咎人也  
知其悔吝而憂之則不憂悔其无咎而震之則不悔  
此易之實用占易之實功子曰加我數年五十以學  
易可以无大過有以也夫

### 易與天地準故能彌綸天地之道

與天地準準天地以為易也而天地不言之秘具於易  
中矣彌綸天地之道則補造化之所不及也天之生物  
也必因其材而篤焉栽者培之傾者覆之易也者正明  
以培之覆之理顯示人而代天地以曲成斯民者也

仰以觀于天文俯以察于地理是故知幽明之故原始及終故知死生之說精氣為物游魂為變是故知鬼神之情狀

幽不可見明不可窮然而實理不可掩也故觀天文察地理而幽明所以然之故可得而知也生者人之初也而未生之前有始之者死者人之盡也而既死之後有終之者故原其所以始反其所以終死生之說可得而言也精氣聚而為物物者鬼神也非如人之形質也而實非無也游魂動而為變變者鬼神也惟其以游魂為

用故隱見變化而不可窮也。此鬼神之情狀也。聚則不散，變則不測。

與天地相似，故不違；知周乎萬物，而道濟天下，故不過；旁行而不流，樂天知命，故不憂；安土敦乎仁，故能愛。

相似，合德也。易與天地相似，故易之理與天地不違。知周乎萬物，徹萬物之終始也。道濟天下，成位乎其中也。不過者，有知物之實理可言。有濟物之實事可據，而非誣也。旁行而不流，縱橫四達而未始悖於道也。樂天者，天自可樂，利害禍福有不足入於其心矣。知命者，命自

有定而利害禍福又無可言也。易之道令人無憂蓋實有把柄在中實見得所以然非徒令人排遣而已也。安土是土可安無夷險一也。敦乎仁覆冒天下而無遺也能愛曲成萬物使皆立於無過之地也。惟已能安土敦仁而後能愛也。

相似合德也。聖人即天地何得有違周物盡物之性也。惟其能知之是以能濟之不過者裁成之中有大作用所謂經綸天下之大經。天地間原有此聖功神化非索隱行怪而失之過也。旁行從心所欲也不流不渝矩也。

樂天與天為徒也。知命非徒知一人之命。知造化所以然之命也。樂天知命。聖人之心有大焉者矣。夫何憂安土。不擇地而安之也。敦乎仁。肫肫其仁也。仁者愛之本也。安土者。仁之實也。造次顛沛。不足以移其安。故於物無忤。而肫肫淵淵浩浩。故其仁不窮。必如是而後能愛。所謂天地之大德曰生。貫寒暑晦明而無息者也。樊遲問仁。子曰愛人。又覺渺乎小矣。此就聖人以身體易而言之也。此一節道理大而難窮。聖言之中不容加一字。一釋便遠。今雖多言煩稱。總在依稀影響之間。玩而味。

之存諸心而默求之可矣諸家註解不能盡也。

範圍天地之化而不過曲成萬物而不遺通乎晝夜之道而知故神无方而易无體

神故无方天地聖人之所以為大也易无體然則以八卦求易已落方所矣。

#### 右第四章

易之道與天地準包乎天地之道而不可窮詰者也。

#### 一陰一陽之謂道

天地之道陰陽而已矣陰陽交錯千變萬化貫古今晝

夜而未有息也。

繼之者善也。成之者性也。

繼之者。繼渾渾淪而流行不息之道。所以露其端也。善。天地之生理也。成之者。妙合之真。所以著於形也。性。人物之稟賦也。

仁者見之謂之仁。知者見之謂之知。百姓日用而不知。故君子之道鮮矣。

陰陽之道。渾渾乎其不可測也。蕩蕩乎其不可名也。涉於人而各隨其分量之所至。識見有淺深。則見道有大

小即如仁知其至矣。然自仁者見之則謂之仁耳。道不可以仁舉也。知者見之則謂之知耳。道不可以知言也。若百姓則生生化化於大道之中。日用之而不知。是以知君子之道鮮矣。道自流行。人自昧昧。此道之所以為大。而非聖人不足以體之也。莊子曰。德遺堯舜而不為也。况大息而言仁孝乎哉。蓋本諸此。

顯諸仁。藏諸用。鼓萬物而不與聖人同憂。盛德大業至矣哉。

顯諸仁。生生不已也。用即其顯之者也。生生而莫知其

所以生藏諸用也。即仁即用。即顯即藏。所謂費而隱也。聖人憂天地不憂。聖人有情。天地無情。大舜有大焉。天地之謂也。

富有之謂大業。日新之謂盛德。

匠鑄萬有而無窮極。天地之富有天地之大業也。發榮滋長而無間歇。天地之日新。天地之盛德也。

生生之謂易。

生生者。生之無窮極也。千變萬化。循環無端。而易生焉。易者。變易也。蓋在吉凶悔吝之前。而包乎吉凶悔吝之

理者也。

成象之謂乾效法之謂坤

陰陽之畫成而乾坤之名立焉。

極數知來之謂占通變之謂事

極其數可以窮天地之情而能知來是謂之占。占者深入而研其幾也。既研其幾則有變通可以盡吉凶之理。故能決事之謂事者必如是而後事無遺憾也。

陰陽不測之謂神

陰陽有定體無定用。陰而陽陽而陰。陰中有陽陽中有

陰晦明變化循環無端消息盈虛迭運無已令人見其  
然莫知其所以然君子之道費而隱莫可窮詰莫可推  
測是之謂神也

右第五章

極仁知之分量而不足以盡陰陽極陰陽不測之神  
合之而為易

夫易廣矣大矣以言乎遠則不禦以言乎邇則靜而正以  
言乎天地之間則備矣

遠深言之也不禦極陰陽不測之神也邇淺言之也靜

而正不可得而玩易之也。備矣。言天地間之事無古今一也。

夫乾其靜也專其動也直是以大生焉。夫坤其靜也翕其動也闢是以廣生焉。

此皆就易言之也。乾靜乾之不動者也。專者純陽之德也。動者乾之變也。直則有浩然莫禦者焉。而乾之大用於是乎在矣。大生乾之體也。坤靜坤之不動者也。翕者純陰之聚也。動者坤之變也。闢則有歛而能發者焉。不專於陰凝矣。廣生坤之量也。大生廣生者變化之端。相

息於无窮也。此承上文夫易廣矣大矣故宜就易言。諸家皆就天地言恐非語意。

廣大配天地變通配四時陰陽之義配日月易簡之善配至德

此言易與天地同德。

右第六章

本天地以畫易故易行而與天地合德

子曰易其至矣乎夫易聖人所以崇德而廣業也知崇禮卑崇效天卑法地

易者所以窮吉凶悔吝之原使人崇德而廣業也。遵易之道以脩德則夭壽不貳而德日崇。遵易之道以樹業則利害不叅而業自廣。知者所以知乎易也。愈窮則愈上。故知崇禮者所以履乎易也。愈履則愈實。故禮卑效天之高。乾配天也。法地之卑。坤配地也。

天地設位而易行乎其中矣。成性存存道義之門。

有天地便有易。滿天地皆易也。但人自不識耳。故天地設位而易行乎中。易成而彌綸天地而天地成位乎中。蓋相資也。成性成之者性也。存存守而不失也。道義之

門道義從此中出也。二語似推而言之。非論易也。且語意頗似老子。不類夫子口氣。

右第七章

此章極言易之用甚大。非徒令人占吉凶也。

聖人有以見天下之賾而擬諸其形容象其物宜是故謂之象

聖人有以見天下之動而觀其會通以行其典禮繫辭焉以斷其吉凶是故謂之爻

言天下之至賾而不可惡也言天下之至動而不可亂也

擬之而後言議之而後動擬議以成其變化

擬之議之聖人之於易亦勞心矣擬之而言非一言可盡也議之而動非一事可指也而變化於是乎生焉

鳴鶴在陰其子和之我有好爵吾與爾靡之。子曰君子居其室出其言善則千里之外應之況其邇者乎居其室出其言不善則千里之外違之況其邇者乎言出乎身加乎民行發乎邇見乎遠言行君子之樞機樞機之發榮辱之主也言行君子之所以動天地也可不慎乎中孚九二言行君子之所以動天地也然則不論君子小人其言

行之善不善皆足以動天地人固未嘗一息不與天地  
相關可以暗室屋漏為可欺乎所以然者人有暗室屋  
漏天地無暗室屋漏也出其言善而千里之外應之以  
之況邇易知也出其言不善而千里之外違之以之況  
邇似倒當言邇者違之而況千里之外乎孟子曰身不  
行道不能行於妻子是也然則夫子之言如此者何也  
意者近者狎而遠者嚴故千里之外且應之而邇者敢  
狎乎近者真而遠者疑故千里之外且違之而真者可  
欺乎以此理推之則言之善不善天地將與之應違而

邇者善或未必感不善或未必厭何者天地虛而無心  
邇者私而易蔽也然則出其言不善千里之外達之而  
邇者反有不然者矣然後知聖人之言不可易也

聖人因鶴之鳴和而極言之如此然則就爻索爻亦已  
遠矣而況乎并爻有不能通者乎子曰不占而已矣則  
告往知來當必有百千億萬而不可窮者

出其言不善則千里之外達之而況其邇者乎余初以  
為倒既而以為非改為前議已而思之亦未盡也此論  
應感自然之妙為鶴鳴子和言之也夫鳴鶴在陰子不

聞也而和之。非和其聲也。天機相感。其子亦不知也。夫言善不善而千里之外應之。違之。非應違其言也。氣機所動。莫知其然而然也。吾人於天人相與之際。有真機存焉。故君子以言行爲樞機。而榮辱之本。於是焉在。然後知聖人之言。其不能理會者多矣。

同人先號咷而後笑。子曰。君子之道。或出或處。或默或語。二人同心。其利斷金。同心之言。其臭如蘭。同人九五

同心可以斷金。此所以不得同則號咷。既得則笑也。不然。不如是之迫切也。

初六藉用白茅无咎子曰苟錯諸地而可矣藉之用茅何咎之有慎之至也夫茅之為物薄而用可重也慎斯術也以往其无所失矣大過初六

惟其重也雖薄物可重也而况進焉者乎以慎行之夫下無不宜矣

勞謙君子有終吉子曰勞而不伐有功而不德厚之至也語以其功下人者也德言盛禮言恭謙也者致恭以存其位者也謙九三

勞謙君子有終吉爻辭也夫子不言有終不言吉但言

其厚能以功下人。是君子之不居功也。惟有厚而不伐。盡其在我者而已。終與吉有不足言者矣。德言盛。日新而未有已也。禮言恭。德愈大而心愈小也。人人能恭。尋常之功亦何足言。惟德盛而禮恭。是為真恭。德言盛。禮言恭。君子居身之珍也。有終而吉。不亦宜乎。

亢龍有悔。子曰。貴而无位。高而无民。賢人在下位而无輔。是以動而有悔也。乾上九

驕侈孤立之鑒也。

不出戶庭。无咎。子曰。亂之所生也。則言語以為階。君不密。

則失臣臣不密則失身幾事不密則害成是以君子慎密而不出也節初九

出戶庭未必能有所事而不能無所言無益之言不足以濟事而適足以階亂是以君子不出也非苟以避事而已蓋有所慎之夫子推而極言之也

子曰作易者其知盜乎易曰負且乘致寇至負也者小人之事也乘也者君子之器也小人而乘君子之器盜思奪之矣上慢下暴盜思伐之矣慢藏誨盜冶容誨淫易曰負且乘致寇至盜之招也解六三

人而至於盜斯惡之矣由君子之觀言之盜豈易言哉  
自古盜之興也未有不由小人致之也有國者不悟猶  
以小人治盜夫猶抱薪救火也夫盜者天地之戾氣也  
凡天下不平之事必有人焉以治之治之者上之也上  
之人持權而平人之所不平人情平而法亦舉謂之道  
上之人自誘其變或有激之自起而平其所不平情快  
而法亡則謂之逆謂之盜矣盜不可訓也而不能使之  
不為盜者上授之也夫子之所謂盜者謂小人而能行  
意若魯家剽孟郭解之徒皆以布衣行權其次如陳

勝吳廣之流皆能剪除克黨有以大快乎天下之心非尋常者也。惟漸而不已蔓而不治於是乎焚劫公行玉石俱碎而盜斯為世之憂患然而難言之矣夫在上者不求乎盜之不平而第求平盜是以愈平而盜愈紛由其不知盜也。故人之貪殘淫惡者可以私於君子之前不可以私於小人之前亦知之乎。蓋君子能讓天下之所必爭而小人不能忍錙銖之所必較也。

右第八章

爻也者象之顯者也。而辭也者又爻之顯者也。然而

辭不盡爻意不盡辭。夫子略舉數爻之辭而究言之。而知爻之蘊蓄無窮也。夫有終而吉。以勞謙盜之作也。以負乘吉凶。非失得之象乎。言以不善而得違。龍以亢而兆悔。悔吝非言其小疵乎。白茅之藉也。戶庭之不出也。皆時事之可以卜悔者也。而以慎得免於咎。非其能補過之力乎。凡此皆以實事分實應。易之於人。豈小補也哉。

天一地二天三地四天五地六天七地八天九地十陽數奇而陰數偶也。

天數五地數五五位相得而各有合天數二十有五地數三十凡天地之數五十有五此所以成變化而行鬼神也不錯綜其數則無以成變化不極其變化則無以盡陰陽之理而顯鬼神之實事行鬼神數明而鬼神為吉為凶行於其中也。

大衍之數五十其用四十有九分而為二以象兩掛一以象三揲之以四以象四時歸奇于扚以象閏五歲再閏故再扚而後掛

乾之策二百一十有六坤之策百四十有四凡三百有六

十當期之日

二篇之策萬有一千五百二十當萬物之數也

極乾坤之策數至於萬有奇總之不出於天數五地數五而推之也

是故四營而成易十有八變而成卦

八卦而小成

引而伸之觸類而長之天下之能事畢矣

因四營而成變因十八變而成卦因成卦而引伸無窮而鬼神之情形畢露無遺此所謂變化而行鬼神也

顯道神德行是故可與酬酢可與祐神矣

因策而成卦卦立而義生而易道於是始顯也得吉凶之占而識進退之宜為其所當為不為其所不當為權衡有定變化無方而德行於是斯神可與酬酢而天下無不可處之事可與佑神而助神道裁成之所不及蓋福善禍淫者神也兆吉凶之象使人懼不善而遷善者易也人知禍福之司在神祈神之佑之亦知善惡之司在易祐神而可使不淫罰者乎

子曰知變化之道者其知神之所為乎

變化者鬼神也。知變化而變變化者易也。易以鬼神之情狀告人。人苟能知鬼神之所以為鬼神。豈有與天違而自凶者乎。是故知周乎萬物而道濟天下也。旁行而不流也。樂天知命而不憂也。寧止不流不憂而已。而又能愛也。蓋浩然於天地之間。而綽綽然有餘裕也。易之所以醇醇萬變而祐神鬼也。聖人之所以知天地之化育而參天地有以升。

右第九章

道非數不顯。數非道不神。

易有聖人之道四焉以言者尚其辭以動者尚其變以制器者尚其象以卜筮者尚其占

其辭其變其象其占皆鬼神自然之變化而易顯其象者也。

是以君子將有為也將有行也問焉而以言其受命也如嚮無有遠近幽深遂知來物非天下之至精其孰能與于此

參伍以變錯綜其數通其變遂成天地之文極其數遂定天下之象非天下之至變其孰能與于此

不參伍則變不生不錯綜則數不亂變成而文生數極而變密寂然無端之中而有象可求者數爲之也數極而理見

易无思也无爲也寂然不動感而遂通天下之故非天下之至神其孰能與于此

夫易聖人之所以極深而研幾也

唯深也故能通天下之志唯幾也故能成天下之務唯神也故不疾而速不行而至

子曰易有聖人之道四焉者此之謂也

右第十章

問焉而以言其受命也如嚮是易之不欺也然而無有遠邇幽深遂知來物非尋常之識所能到也參伍錯綜窮神極變非迹象之粗所能窺也聖人以此極深而研幾然則雖盡力尋求有不能彷彿其藩籬而況置焉不講欲以免咎不亦宜乎

子曰夫易何為者也夫易開物成務冒天下之道如斯而已者也是故聖人以通天下之志以定天下之業以斷天下之疑

君子小人之志千態萬狀而未有其極千思萬慮而未有其止千疑萬覲而未有其歸惟歸之於卜筮理明辭決一切志願截然而消豁然而釋矣故能通天下之志也

是故著之德圓而神卦之德方以知六爻之義易以貢聖人以此洗心退藏于密吉凶與民同患神以知來知以藏往其孰能與于此哉古之聰明睿知神武而不殺者夫

圓則無定用方則無定體易則無隱晦易之德具於聖人之心不待著筮然則為易者所以示人也聖人欲偕

天下皆有吉而无凶然而不能也故為之易以著其吉凶使人曉然于吉凶之理知所趨避可不至于迷吉而趨凶是吉凶與民同患也或謂吉亦有患引老子寵辱若驚為証腐甚聰明睿知故能與天合德而作易神武不殺未嘗不威然有所以威天下而使之洗心易慮而不至於用殺則聖人所以輔相裁成大幹旋大仁慈吉凶與民同患之實也知來知未來之事於所筮之中藏往藏所筮之吉凶於卦中

著之德圓而神似又以著輔易易苟無著無以神其用

矣然則具知來藏往之德者易邪知筮者之吉凶而引之於卦之所合者著邪

是以明于天之道而察于民之故是興神物以前民用聖人以此齊戒以神明其德夫

是興神物以前民用蓋未有民事之先而如此則吉如此則凶其理已具矣民之用合乎天則吉違乎天則凶已定之矣聖人興神物以示之而果不欺也此易之道所以不可不知也人皆言事有前定人無如之何而不知事以理定理得而事無不從但人不能故其能逃于

數耳。聖人以此齋戒以神明其德。非聖人故神之也。古者神人相通。是故司盟之職設于周官。蓋無事不奉鬼神以從事。易之道。聖人之所以通鬼神也。故齋戒以告虔。極數以盡變。誠之所至。神亦臨之。故其受命也如響。蓋實有是理。實有是神。實有是卜筮。實有是吉凶。鬼神既不欺聖人。亦不敢違。故曰通變化而行鬼神。行鬼神亦鬼神依人而行也。若不極其數。則變化不通。而鬼神亦不行矣。神明自神明。聖人因而神明之。非聖人故神明之也。

是故闔戶謂之坤闢戶謂之乾一闔一闢謂之變往來不窮謂之通見乃謂之象形乃謂之器制而用之謂之法利用出入民咸用之謂之神

易之道百姓日用而不知耳聖人以易之道左右民而民之利賴于日用之中而得吉去凶者蓋無物不有無時不然不知幾何矣所謂聖人吉凶與民同患神乎神乎洋洋乎發育萬物峻極于天優優大哉此易道之所以為大而聖人參贊之實事也若夫涉于卜筮者一事之理一人之用耳未足以言易也

是故易有大極是生兩儀兩儀生四象四象生八卦  
八卦定吉凶吉凶生大業

吉凶生大業吳臨川謂占筮以定吉凶俾民無所疑而  
勇于趨事赴功此語亦未盡夫占筮而必知其有吉無  
凶勇往可也若占筮而有凶無吉不阻人作事之氣乎  
此又不然夫占吉而無疑不待言矣若占凶則非趨避  
可免不勉力于善將安之乎是節義之所生也可不謂  
大業乎要之此亦大概言之耳其中變化之理固非一  
言可盡也因此悟斷天下之契者未卜筮之前行止不

人壽金丹 卷一  
定且前且却者疑也既卜筮之後吉固不疑凶亦不疑而志向不惑矣非必盡謂吉乃不疑也不疑而何事不德何業不立乎子曰匹夫不可奪志也

是故法象莫大乎天地變通莫大乎四時縣象著明莫大乎日月崇高莫大乎富貴備物致用立成器以為天下利莫大乎聖人探賈索隱鈎深致遠以定天下之吉凶成天下之亹亹者莫大乎蓍龜

定吉凶而成亹亹者吉凶一定志向亦一定有所持循也夫杖非以為目也然矇者得之則敢放步而無傾跌

之患夫著龜亦衆庶之矇杖也。

是故天生神物聖人則之天地變化聖人效之天垂象見吉凶聖人象之河出圖洛出書聖人則之

天垂象見吉凶與天地變化不同天地變化運行之常理也垂象見吉凶則實有吉凶之理一時之兆象也然參伍天地之變化可以鈎深致遠可以定將來之吉凶然而微乎微矣故非天下之至精至變至神不足以與於斯也此與垂象見吉凶微異然皆未易言也

易有四象所以示也繫辭焉所以告也定之以吉凶所以

斷也

右第十一章

易曰自天祐之吉无不利子曰祐者助也天之所助者順也人之所助者信也履信思乎順又以尚賢也是以自天祐之吉无不利也大有上九

欲順則順何待于思蓋順未易言也有順之而不必順者非禮之禮非義之義是也有逆之而不必不順者一家非之而不顧一國非之而不顧天下非之而不顧是也是故思之思之順之真也

子曰書不盡言言不盡意然則聖人之意其不可見乎子曰聖人立象以盡意設卦以盡情偽繫辭焉以盡其言變而通之以盡利鼓之舞之以盡神

既云書不盡言又云繫辭焉以盡其言何也不盡言不能盡聖人之所欲言也盡其言盡其卦爻之所兆象也繫辭焉雖能盡卦爻之所兆象不能盡聖人之所欲言非不欲盡言不能盡也故但立之象使人以事求卦以卦求象以象求意事無窮而象無方隨事得象隨時取義苟能冥悟而聖人不言之意於是乎可求矣

乾坤其易之緼邪乾坤成列而易立乎其中矣乾坤毀則无以見易易不可見則乾坤或幾乎息矣

乾坤即所畫奇耦之乾坤也一奇一耦之象立而易之理盡蘊藏於此矣成列即奇偶之列也毀此二畫則无以見易易不可見則乾坤之理亦或幾乎息而不著矣是故形而上者謂之道形而下者謂之器化而裁之謂之變推而行之謂之通舉而措之天下之民謂之事業

天地間之理有形上形下之分有道與器之殊是不得不分不得不殊其實又分不得殊不得蓋道與器一物

器即道也。聖人於此道與器之中。神而明之。化而裁之。蓋道渾無形。器成有定。變則无方。而不可窮。皆道與器之所生也。然非聖人之不能變也。既得其用於是。推而行之。則謂之通通達無礙也。如制器尚象。皆因卦取裁。制用而變化。莫可端倪。乃舉而措之。天下之民。皆亨易之用。而聖人之事業可指矣。

是故夫象聖人有以見天下之賾。而擬諸其形容。象其物宜。是故謂之象。聖人有以見天下之動。而觀其會通。以行其典禮。繫辭焉。以斷其吉凶。是故謂之爻。

擬諸其形容象其物宜以盡天下之賾也然則於易之中不能見天下之賾者不足與言易矣見天下之動而觀其會通天下之動各不相謀也然未有不相會也各不相聞也然未有不相通也其會也通也乃天理之自然人情之必然而終歸于極也故聖人觀於其所會通之處以行其典禮三千三百皆天理人情之極致天下古今所共安而不覺其煩者也此易之大用也所以道濟天下範圍天地之化曲成萬物而前民用者也至於繫辭焉以斷其吉凶是又而已已落第二義矣

極天下之賾者存乎卦鼓天下之動者存乎辭

胡氏雲峰曰窮天地萬物之象而盡諸卦故曰極發天地萬物之理而見乎辭故曰鼓

化而裁之存乎變推而行之存乎通神而明之存乎其人默而成之不言而信存乎德行

化而裁之神而明之默而成之不言而信至此便覺言語文象皆無所用之矣神乎微乎夫子加我數年之嘆蓋有以也然而歸之於德行如善言德行者皆可以稱德行是德行不足以盡易也明矣如云然者非德行無

人字集注卷十一  
三  
以凝心見理而入於易也是學易之門也。

右第十二章

以陰陽二畫而窮天地之變極道器之微以變通神明而窮變動之賾極物理之用天地不言而易言之易象不顯而聖人繫辭焉以顯之微乎微乎存乎其人而已矣。